


Cristian Cavegn, Camischolas

VB. Il defunct Cristian Cavegn ei gl'emprem ch'ei vegnius mess en bara ella caplutta da morts renovada e decorada. Mond dacuort sperasora, veva el segir cuhegiu viaden, admirau la biala pictura da scolast Flepp, il veider da Dea Murk, il bi crucifix e legiu ils versets significonts. «Sa tgi che pren sco emprem plaz en quella edificonta stiva?» era el forsa sedumandaus.

Cul defunct Cristian prendein nus cumiau d'in bien bab, d'in vischin da siu fatg, d'in pur genuin ed endinau. La basa da siu far e demanar irrepreschabel era sia profunda cardientscha artada da ses perdavons e praticada duront sia entira veta. Sia tenuta integra han ils parochians era renconuschiu cun eleger el sco emprem president da pleiv suenter la separaziun da vischnaunca politica e pleiv. Quei pensum ha el adempli cun distincziun.

Il trapassau ei naschiu ils 2 da zercladur 1913 a Rueras. El ei staus il feagl vegl dils geniturs Lucas Cavegn e Maria Barbara, nata Gieriet. El ravugl d'ina gronda famiglia da 14 affons eis el vegnius gronds, ha el beingleiti empriu da sevolver e segidar. Affonza ed onns da scola ha el passentau a casa, nua ch'el ha era empriu d'enconuscher ed apprezzar la lavur purila. Pur, in pur da vaglia, leva el vegnir e perquei ha el frequentau la scola d'agricultura giu a Pfäffikon. –

Returnaus a casa eis el sededicaus cun tgierp ed olma al puresser. Per quella biala clamada leva el era entusiasmar ses vischins e perquei detestava el ils muntatuttina e mirastgir.



Ils 12 d'avrel 1945 ei il Cristian sespu-saus culla giuvna pura Tresa Berther, da Camischolas. Siat onns han ils nievpsusai habitau a Gonda per allura secasar en lur casa nova a Camischolas. La lètg ei stada tgina e stiva da 7 affons: 5 mattatschas e 2 mattatschs.

Ina ventireivla famiglia, in bi menaschi puril

Sper siu beinmanischau fatg agricol ha il defunct era aunc priu e giu peda da sededicar als problems publics. Da bial'entschatta, dapi igl onn 1970, ha el fatg part sco vicepresidente dalla suprastanza

dalla corporaziun da meglieraziun Tujetsch. Oz ei l'arrundaziun e meglieraziun dils funs quasi sut tetg. Sche tut ei reussiu senza pli gronds incaps, eisi segiramein era il meret digl apprezzau defunct Cristian. Contas pataheflas ch'ei ha dau da laguoter, san mo quels ch'han stuii star alla testa.

Dagl onn 1967 entochen 1973 ei il Cristian era staus ella suprastanza communal. Cun maun segir ha el dirigi il fatgs dall'agricultura e cun prudientscha ha el surveglau il fatgs da baghegiar. Senza planisaziun locala, senza uffeci e cumissiun da baghegiar, mo per mauns d'ina fetg sempli lescha da baghegiar era ei nuota legher da tener la surbaghegiada en rama. Mo grazia a sia premura e siu grond engaschi eisi reussiu d'evitar stravaganzas e da direger il svilup en ina fuorma sauna e raschuneivla. Per ton engaschi en pleiv e vischnaunca mereta il trapassau renconuschientscha ed engraziament.

La ventira nunperturbada ha priu in'aretga fin culla mort prematura dalla cara consorta e mumma ils 19 da settember 1980. Quella nauscha frida d'in criu destin ha custau forza ed ils mals dil defunct ein vegni pli e pli frequents. La finala ha la malsogna sfurzau il trapassau el spital a Glion, nua ch'el ha surdau sia olma al scaffider ils 19 d'uost. Oravontut en famiglia, mo era el vischinadi ed en vischnaunca lai il defunct anavos ina gronda largia. In bien e premurus bab, in engaschau vischin ei buca pli. – Als affons e parents esprimin nus nossa sincera condolientscha, al defunct detti Dieus il beinmeritau ruaus perpeten.